

JAMHURI YA MUUNGANO WA TANZANIA

BUNGE LA TANZANIA



KAMATI YA KUDUMU YA BUNGE YA BAJETI

**MUSWADA WA MAREKEBISHO YA SHERIA YA KUDHIBITI UTAKATISHAJI
WA FEDHA HARAMU WA MWAKA, 2022
(*THE ANTI - MONEY LAUNDERING (AMENDMENT) ACT, 2022*)**

Ofisi ya Bunge,
S.L.P 941,
DODOMA.

08 Februari, 2022

YALIYOMO

1.0 UTANGULIZI	3
1.1. Uchambuzi wa Muswada	3
1.2. Chimbuko la Muswada	3
2.0 MAONI NA MAPENDEKEZO YA KAMATI KUHUSU MUSWADA WA MAREKEBISHO YA SHERIA YA KUDHIBITI UTAKATISHAJI WA FEDHA HARAMU WA MWAKA, 2022 (THE ANTI - MONEY LAUNDERING (AMENDMENT) ACT, 2022)	4
2.1. Sheria ya Kudhibiti Utakatishaji wa Fedha Haramu wa Mwaka, 2022	4
2.1.1. Ibara ya 4 ya Muswada kuhusu Tafsiri ya Maneno.....	4
2.1.1.1. Watoa Taarifa “Reporting Persons”.....	4
2.1.1.2. Upembuzi wa Kina wa Mteja “Customer Due Diligence”	5
2.1.1.3. Maneno “Family Member”.....	6
2.2. Ibara ya 14 ya Muswada inahusu Uandaaji na Utunzaji wa Kumbukumbu	6
2.3. Ibara ya 19 ya Muswada inaweka Jukumu kwa mtu yeyote anayesafiri kuingia ama kutoka nje ya nchi kutoa tamko au taarifa kuhusiana na fedha taslimu au hati za kifedha alizonazo.	7
2.4. Ibara ya 14 ya Muswada inayohusu Wajibu wa Watoa Taarifa kutunza Kumbukumbu.....	7
2.5. Sheria ya Benki Kuu 197 “The Bank of Tanzania Act Cap 197”, Sheria ya Bima Sura ya 394 “The Insurance Act Cap 394” na Sheria ya Masoko ya Mitaji na Dhamana Sura ya 79 “Capital Market and Security Act Cap 79”	7
2.6. Sheria ya Ushirikiano katika Masuala ya Jinai Sura ya 254 “Mutual Assistance in Criminal Matters Act Cap 254”	8
2.7. Sheria ya Ugaidi Sura ya 19 “Prohibition of Terrorism Act Cap 19”	8
2.8. Sheria ya Mapato ya Uhalifu Sura ya 256	9
3.0 MAONI NA MAPENDEKEZO YA JUMLA	9
3.1. Sheria kutoa muda wa maandalizi kwa ajili ya kuandaa mazingira ya kutunza kumbukumbu. ...	9
3.2. Kuongeza majukumu ya FIU kupokea taarifa na kushughulikia fedha zinazotokana na usafirishaji haramu wa binadamu.	9
3.3. Kuangalia uwezekano wa kuanzisha Wakala wa Udhibiti Fedha Haramu (The Anti Money Laundering Agency) itakayokuwa chini ya Wizara ya Fedha.	10
3.4. Nchi kuwa na mfumo wa kudhibiti rasilimali fedha, hati za fedha na amali za kimtandao.....	10
3.5. Kutunga Sera ya Kudhibiti Ugaidi Tanzania.....	10
3.6. Kujiandaa kisera, kimbinu na kimfumo katika kapambana na utakatishaji wa fedha haramu na ufadhili wa ugaidi.....	11
4. HITIMISHO	11

**TAARIFA YA KAMATI KUHUSU MUSWADA WA MAREKEBISHO YA SHERIA YA
KUDHIBITI UTAKATISHAJI WA FEDHA HARAMU WA MWAKA, 2022 (THE ANTI
- MONEY LAUNDERING (AMENDMENT) ACT, 2022))**

1.0 UTANGULIZI

Mheshimiwa Spika, kwa mujibu wa Kanuni ya 99 (1) (b) ya Kanuni za Kudumu za Bunge, Toleo la 2020 naomba kutoa maoni na ushauri wa Kamati ya Kudumu ya Bunge ya Bajeti kuhusu Muswada wa Sheria ya Kudhibiti Utakatishaji wa Fedha Haramu wa Mwaka 2022 (The Anti-Money Laundering Bill, 2022). Tarehe 3 Februari, 2022, Waziri wa Fedha na Mipango aliwasilisha Bungeni Mapendekezo ya Serikali ya Muswada huu, na baada ya kuwasilisha Muswada huo, Mheshimiwa Spika uliagiza Kamati ya Bunge ya Bajeti kuuchambua Muswada huo. Tarehe 4 Februari, 2022, Naibu Waziri wa Fedha na Mipango, Mhe Hamad Hassan Chande (Mb) aliwasilisha Mapendekezo hayo mbele ya Kamati kwa niaba ya Serikali.

1.1. Uchambuzi wa Muswada

Mheshimiwa Spika, Kamati kwa muda wa siku mbili ilifanya vikao kwa ajili ya kuuchambua Muswada huu. Kamati imepitia Muswada huu kifungu kwa kifungu kwa madhumuni ya kujielimisha maudhui ya kila kifungu na kupendekeza marekebisho katika maeneo ambayo yanahitaji maboresho. Baada ya kujiridhisha na maudhui ya Muswada, tarehe 06 Februari, 2022 Kamati ilifanya majadiliano ya kina na Waziri wa Fedha na Mipango, Mwandishi Mkuu wa Sheria, pamoja na Wataalamu kutoka Wizara ya Mambo ya Ndani ya Nchi, Wizara ya Fedha na Mipango, Benki Kuu ya Tanzania pamoja na Ofisi ya Mwendesha Mashtaka.

1.2. Chimbuko la Muswada

Mheshimiwa Spika, Katika uchambuzi wa Kamati imebainika kwamba Chimbuko kubwa la Muswada Huu linatokana na Taarifa ya Umoja wa Nchi za Kusini na Mashariki mwa Afrika katika Kupambana na Utakatishaji wa Fedha haramu (*East and Southern Africa Anti-Money Laundering Group – ESAAMLG*). Taarifa hiyo iitwayo “*Anti-money laundering and counter-terrorist*

financing measures Mutual Evaluation Report Tanzania” iliyotolewa Mwezi Juni, 2021.

Mheshimiwa Spika, Kamati ilibaini kwamba katika Taarifa hiyo Tanzania ilionekana ni eneo lenye viashiria vya Kati na vya juu katika mazingira ya Utakatishaji fedha na ufadhili wa Ugaidi (silaha za maangamizi). Aidha, kwa sasa Tanzania ipo chini ya uangalizi wa *Financial Action Task Force (FATF)* na ESAAMLG, Taasisi za Kimataifa ambazo AU na Tanzania ni wanachama mtawalia. Vilevile, Kamati ilibaini kwamba marekebisho haya ya Sheria endapo yatacheleweshwa yanaweza kusababisha nchi yetu kuonekana eneo oevu la kuchochea vitendo vya ugaidi na Utakatishaji wa fedha haramu (silaha za maangamizi). Hivyo, Kamati ilijiridhisha bila shaka kwamba Muswada huu ulistahili kuletwa Bungeni kwa Hati ya Dharura.

2.0 MAONI NA MAPENDEKEZO YA KAMATI KUHUSU MUSWADA WA MAREKEBISHO YA SHERIA YA KUDHIBITI UTAKATISHAJI WA FEDHA HARAMU WA MWAKA, 2022 (*THE ANTI - MONEY LAUNDERING (AMENDMENT) ACT, 2022*)

Mheshimiwa Spika, Muswada huu unafanya mabadiliko katika Sheria 6. Sheria ya kwanza ni Sheria Kuu ambayo ni Sheria ya Kudhibiti Utakatishaji wa Fedha Haramu Sura ya 423 na Sheria nyingine 5 zinafanyiwa mabadiliko ili ziendane na maudhui ya mabadiliko yaliyofanyika katika Sheria ya Udhhibiti na Utakatishaji wa Fedha Haramu. Baada ya majadiliano ya kina baina ya Kamati na Serikali, Kamati ina maoni na mapendekezo yafuatayo kwenye ibara mbalimbali za Muswada: -

2.1. Sheria ya Kudhibiti Utakatishaji wa Fedha Haramu wa Mwaka, 2022

2.1.1. Ibara ya 4 ya Muswada kuhusu Tafsiri ya Maneno

2.1.1.1. Watoa Taarifa “*Reporting Persons*”

Mheshimiwa Spika, Kamati imebaini kwamba mawanda ya watoa Taarifa “*Reporting persons*” yameongezwa kwa kuwajumuisha wauzaji wa magari “*Car dealers*”, mawakala wa Forodha pamoja na Makampuni ya Kutunza Taarifa za Wakopaji “***Credit Reference Bureau***”. Kwa

mujibu wa majukumu yaliyobainishwa ya watoa huduma katika Sheria hii ni wazi kwamba itakuwa vigumu kutekelezwa na wauzaji wa magari ambao hawana makampuni na kwa kuwa nyaraka zote na mifumo wanayotumia mawakala wa forodha ama yanapitia katika Benki za Biashara au kupitia Mifumo ya Mamlaka ya Mapato Tanzania. Kamati inashauri ifuatavyo: -.

- i. Kufanya marekebisho kwa kuondoa maneno *car dealers* na badala yake iwe ni “*registered car dealers*” ili iwaguse wale tu wenye makampuni yanayofanya kazi hiyo;
- ii. Kuwaondoa “*Clearing and Forwarding*” kwa sababu kimsingi Taarifa zao zote zinakuwa kwenye ama mifumo ya kibenki au mifumo ya Mamlaka ya Mapato Tanzania; na
- iii. Kuondoa “*Credit Reference Bureau*” (CRB) kama watoa Taarifa kwa sababu kimsingi hawafanyi miamala yoyote ya fedha na endapo Serikali inataka Taarifa kutoka kwa CRB inaweza kuziomba na ikapewa.

2.1.1.2. Upembuzi wa Kina wa Mteja “*Customer Due Diligence*”

Mheshimiwa Spika, Muswada unapendekeza kutoa tafsiri ya maneno ‘*Customer due diligence*’ ili kutoa maelekezo kwa watoa taarifa namna ya kufanya upembuzi wa kina wa wateja wao. Lengo la tafsiri ya maneno hayo ni kuhakikisha kwamba endapo watabaini viashiria au kuthibitisha muamala shuku watoe taarifa katika kitengo cha kudhibiti fedha haramu. Kamati ina ushauri ufuatao kwa Serikali: -

- i. Uchumi wetu bado kwa kiasi kikubwa unatumia pesa taslimu kufanya malipo. Watumiaji wa *credit card* na njia nyingine za malipo ya kidijiti ni chini ya asilimia 3 ya Watanzania. Hivyo ni wazi kwamba watanzania wengi wanaweza kujikuta ni washukiwa kwa sababu tu ya uhalisia wa uchumi.
- ii. Taifa bado halijaweza kutengeneza kanzidata ya utambuzi wa watu kurahisisha ufuatiliaji wa taarifa mfano, NIDA hadi hivi sasa

haijaweza kusajili hata asilimia 50 ya Watanzania walio na umri wa kusajiliwa.

Mheshimiwa Spika, kwa msingi huo, Kamati iliishauri Serikali kuondoa maneno *customer due diligence* (CDD) na kuweka neno *monitoring* kwenye kifungu cha 3 cha tafsiri katika Sheria inayofanyiwa marekebisho. Serikali ilikubaliana na mapendekezo ya Kamati kama inavyoonekana kwenye Jedwali la Marekebisho la Serikali.

2.1.1.3. Maneno “Family Member”

Mheshimiwa Spika, tafsiri ya maneno **“Family Member”** yamejumuisha mtu yeyote mwenye uhusiano na *“Politically exposed person”* (PEP). Kwa uelewa tu PEP ni mtu yeyote aliyeko kwenye makundi yafuatayo, wanasiasa, wateuliwa wote, viongozi wa makampuni na mtu yeyote mwenye wadhifa katika kampuni ama udhamini. Hivyo, kwa wanafamilia inajumuisha mwenzwa, watoto, wakwe, ndugu na wabia. Tafsiri hii imeongezewa mawanda na hivyo inaweza kuwa na athari katika utekelezaji wa Sheria. Kamati iliishauri Serikali kwamba, tafsiri ya *“Family member”* iangalie uhusiano wa mwanafamilia na kosa lililotendeka na sio kila mtu. Hivyo, Serikali ilikubali mapendekezo ya Kamati kwa kuondoa maneno ndugu, mwenzwa, watoto, wazazi, na wakwe kama inavyoonekana kwenye Jedwali la Marekebisho

2.2. Ibara ya 14 ya Muswada inahusu Uandaaji na Utunzaji wa Kumbukumbu

Mheshimiwa Spika, Kamati inakubaliana na masharti yote yaliyoko katika ibara hiyo ambayo inafanya marekebisho katika kifungu cha 16 cha Sheria. Hata hivyo, ni vyema marekebisho yakafanyika katika kifungu kidogo cha pili ili kuweka mfumo utakaoweka sharti la FIU kumjulisha mtunza kumbukumbu kuendelea kutunza kumbukumbu endapo kuna shauri au upelelezi juu ya mteja wao linaloendelea. Serikali

ilikubaliana na ushauri wa Kamati na marekebisho yapo kama yanavyoonekana kwenye Jedwali la Marekebisho.

2.3. Ibara ya 19 ya Muswada inaweka Jukumu kwa mtu yeyote anayesafiri kuingia ama kutoka nje ya nchi kutoa tamko au taarifa kuhusiana na fedha taslimu au hati za kifedha alizonazo.

Mheshimiwa Spika, Ibara ya 19 ya Muswada inafanya marekebisho katika Kifungu cha 23 cha Sheria mama ili kuweka utaratibu wa kutoa tamko endapo msafiri ana kiwango cha fedha au hati za fedha ambazo zinazidi kiwango kilichopo kwenye kanuni za Sheria ya Udhhibiti na Utakatishaji Fedha Haramu cha milioni 10. Kamati inakubaliana na maudhui hayo hata hivyo Kamati iliishauri Serikali kuweka kiwango cha ukomo wa muda ambao Afisa forodha anaweza kuzuia fedha ama hati za fedha kabla ya kuruhusu muhusika kuingia ama kutoka nchini. Serikali ilikubaliana na mapendekezo ya Kamati na kuweka ukomo wa siku 14 kama inavyoonekana kwenye Jedwali la Marekebisho la Serikali.

2.4. Ibara ya 14 ya Muswada inayohusu Wajibu wa Watoa Taarifa kutunza Kumbukumbu.

Mheshimiwa Spika, Ibara ya 14 ya Muswada inafanya marekebisho katika Kifungu cha 16 kwa kukifuta na kukiandika upya. Katika kifungu kidogo (6) (a) ilipendekezwa kuwa mtu atakayepatikana na kosa chini ya kifungu hiki atapewa adhabu za kiutawala kwa mujibu wa Kanuni (*Regulations*). Kamati iliishauri Serikali badala ya kuacha adhabu ziwekwe kwenye Kanuni, ni vyema adhabu hizo ziainishwe katika Sheria. Serikali ilikubalina na mapendekezo ya Kamati kama inavyoonekana kwenye Jedwali la Marekebisho ya Serikali.

2.5. Sheria ya Benki Kuu 197 “*The Bank of Tanzania Act Cap 197*”, Sheria ya Bima Sura ya 394 “*The Insurance Act Cap 394*” na Sheria ya Masoko ya Mitaji na Dhamana Sura ya 79 “*Capital Market and Security Act Cap 79*”

Mheshimiwa Spika, Kamati imechambua mapendekezo yaliyopo katika Sheria hizi tatu na kukubaliana na Serikali. Sheria hizi zinasimamia

maeneo ambayo yanaweza kutumika kama uwanja wa kutakatisha fedha haramu. Hivyo kimsingi mabadiliko haya yanaenda kuongeza takwa la kisheria kwa taasisi hizo na taasisi wanazozisimamia kuandaa na kutunza kumbukumbu za miamala shuku na miamala mingine inayopitia katika taasisi hizo.

2.6. Sheria ya Ushirikiano katika Masuala ya Jinai Sura ya 254 “*Mutual Assistance in Criminal Matters Act Cap 254*”

Mheshimiwa Spika, Kamati imekubaliana na maudhui yanayopendekezwa kwenye Sheria hii kwa sababu kimsingi yanasaidia wapelelezi kuwa na uwezo wa kushiriki katika kusindikiza na kufanya utambuzi wa wahalifu nje ya mipaka ya Tanzania. Hatua hii itasaidia wapelelezi wa ndani na wa nje ya nchi kutambua mtandao mzima wa uhalifu katika utakatishaji wa fedha haramu.

2.7. Sheria ya Ugaidi Sura ya 19 “*Prohibition of Terrorism Act Cap 19*”

Mheshimiwa Spika, Kamati imepitia marekebisho yaliyofanyika katika Sheria hii na kubaini kwamba yana malengo makuu matatu kama ifuatavyo: -

- i. Kwanza, ni kuingiza dhana ya ufadhili wa ugaidi kama kosa la ugaidi “*Proliferation Financing*”
- ii. Pili, ni kutenganisha nia na kitendo cha ugaidi. Tafsiri iliyopo hivi sasa kwenye Sheria ilikuwa haiweki tofauti ya kitendo na nia;
- iii. Kuwatambua magaidi binafsi “*Individual terrorists*”. Sheria ilivyo kwa sasa inatambua vikundi vya kigaidi tu “*terrorist groups*” na
- iv. Kuweka utaratibu wa kisheria wa kutangaza magaidi wa ndani ya nchi kupitia Waziri mwenye dhamana ya masuala ya Mambo ya Ndani ya Nchi.

Mheshimiwa Spika, baada ya majadiliano na Serikali, Kamati iliishauri Serikali na ikakubali kuongeza maneno *seriously* ili kuondoa makosa mengine ya kawaida yasije yakatafsiriwa kama makosa ya kigaidi. Kimsingi mapendekezo haya yanaendana na Tamko la Kimataifa la

Kuzuia Ufadhili wa Ugaidi la Mwaka 1999 ambalo Tanzania imeridhia (*The International Convention on Supression of Terrorism Financing, 1999*).

2.8. Sheria ya Mapato ya Uhalifu Sura ya 256

Mheshimiwa Spika, Kamati inakubaliana na marekebisho yaliyofanyika katika ibara ya 50 ya Muswada inayofanya marekebisho katika Kifungu cha 3 cha Sheria hii yenye lengo la kuhakikisha kwamba tafsiri ya maneno “kosa kubwa” (serious offence) linaendana na Mikataba ya Kimataifa ambayo Tanzania imeridhia.

3.0 MAONI NA MAPENDEKEZO YA JUMLA

Mheshimiwa Spika, masuala mengine yaliyojadiliwa katika Kamati wakati wa kupitisha Muswada wa Sheria ya Kudhibiti Utakatishaji wa Fedha Haramu wa Mwaka, 2022: -

3.1. Sheria kutoa muda wa maandalizi kwa ajili ya kuandaa mazingira ya kutunza kumbukumbu.

Mheshimiwa Spika, Kwa kuwa mabadiliko haya yameongeza watoa taarifa “*reporting persons*” wanaowajibika kutunza kumbukumbu na kuwasilisha kwenye Kitengo cha Kudhibiti Fedha Haramu, miamala na taarifa za washukiwa (FIU), hivyo, ni lazima utolewe muda walau wa miezi mitatu ili wahusika wawekeze katika miundombinu ya kuweza kuchukua na kutunza kumbukumbu za wateja wao pamoja na kuelimishwa kuhusu majukumu yao. Aidha, vyema Serikali kuhakikisha vyuo vyote vinavyotoa taaluma ambazo zinahusisha watoa taarifa waliotajwa katika Sheria kunakuwa na mafunzo maalum vyaoni ili kuwafundisha majukumu yao kwa mujibu wa sheria hii.

3.2. Kuongeza majukumu ya FIU kupokea taarifa na kushughulikia fedha zinazotokana na usafirishaji haramu wa binadamu.

Mheshimiwa Spika, Kitengo cha Kudhibiti Fedha Haramu (FIU) kimeongezewa majukumu mapya 6 na kufanya kiwe na jumla ya

majukumu 15. Katika Mwaka wa Fedha 2021/22, Kitengo cha Kudhibiti Fedha Haramu kilitengewa bajeti ya **Shilingi bilioni 1.29** kiasi hiki cha fedha ni kidogo ukilinganisha na majukumu haya. Hivyo, Kamati inaitaka Serikali kuhakikisha kwamba katika Mwaka wa Fedha 2022/23 ni vyema Kitengo hiki kiongezewe bajeti ya kutosha ili kiweze kufanya kazi zake kikamilifu.

3.3. Kuangalia uwezekano wa kuanzisha Wakala wa Udhibiti Fedha Haramu (The Anti Money Laundering Agency) itakayokuwa chini ya Wizara ya Fedha.

Mheshimiwa Spika, kulingana na majukumu ambayo yapo na yaliyoongezwa kwa Kitengo cha FIU, kuna umuhimu kitengo hiki kiwe Wakala inayojitegemea. Kwa sababu kwa mawanda ya watoa taarifa walioongezwa na kwa wingi wa taarifa watazokuwa wanapokea na kuchakata miamala shuku, ni wazi kwamba lazima iwe Wakala na sio kitengo tu. Endapo kitaachwa kama kilivyo uwezo wa kupokea na kuchakata taarifa utakuwa mdogo kuliko mahitaji ya sasa.

3.4. Nchi kuwa na mfumo wa kudhibiti rasilimali fedha, hati za fedha na amali za kimtandao

Mheshimiwa Spika, pamoja na kwamba Sheria ya Udhibiti Utakatishaji wa Fedha Haramu imetambua mali na hati za kifedha za kimtandao, bado nchi haina mifumo rasmi ya kudhibiti na kusimamia mali na amali hizo. Mfano, mzuri ni ushiriki wa Watanzania katika fedha za kidijiti kama *Bitcoin*, *ethereum* na nyinginezo hakuna udhibiti wowote wa ndani. Hivyo, ni wakati sasa wa Tanzania kuanzisha mifumo ya kisheria ya kusimamia na kudhibiti sarafu hizo.

3.5. Kutunga Sera ya Kudhibiti Ugaidi Tanzania

Mheshimiwa Spika, Utaratibu wa kawaida uliozoeleka kwa jambo ambalo sio jipya na lina uharaka, hutungiwa kwanza Sera na baadae Sheria. Kamati inakubaliana na udharura na uhitaji wa Sheria ya kudhibiti ugaidi nchini. Hivyo, kamati inaishauri Serikali kuhakikisha

kwamba Sera ya kudhibiti ugaidi inatungwa ili malengo yake, dhima na dira viendane na Sheria iliyopo.

3.6. Kujiandaa kiseru, kimbinu na kimfumo katika kapambana na utakatishaji wa fedha haramu na ufadhili wa ugaidi.

Mheshimiwa Spika, mabadiliko yanayofanyika ni kwa lengo la kuifanya nchi iendane na mabadiliko ya kimataifa na kuondoa mwanya wa nchi kutumika kama eneo oevu la kutakatisha fedha na kufadhili ugaidi. Hata, hivyo ni lazima Serikali iandae sera, mbinu na mifumo ya kudhibiti utakatishaji wa fedha haramu.

4. HITIMISHO

Mheshimiwa Spika, naomba kutumia fursa hii kukushukuru wewe Mheshimiwa Spika Dkt. Tulia Ackson, (Mb) kwa kunipa fursa hii ili niweze kuwasilisha taarifa ya maoni ya Kamati kuhusu Muswada wa Marekebisho ya Sheria ya Kudhibiti Utakatishaji wa Fedha Haramu ya Mwaka, 2022 (The Anti - Money Laundering (Amendment) Act, 2022). Aidha napenda nimshukuru Mhe. Dkt. Mwigulu Lameck Nchemba (Mb), Waziri wa Fedha na Mipango, Mhe. Hamad Hassan Chande, (Mb) Naibu Waziri wa Fedha na Mipango, Mhe. Dkt. Jaji. Eliezer Feleshi Mwanasheria Mkuu wa Serikali, Ndugu Onerius Njole, Mwandishi Mkuu wa Sheria wa Serikali pamoja na Wataalamu Wizara ya Fedha na Mipango wa kwa Ushirikiano walioutoa katika kipindi chote cha uchambuzi wa Muswada.

Mheshimiwa Spika, napenda kuwakushuruku Wajumbe wa kamati ya Bajeti kwa umakini, umahiri na uvumilivu wao wakati wa kipindi chote cha uchambuzi wa Muswada huu, hasa ukizingatia kwamba muda haukuwa rafiki sana. Wajumbe hao ni:

- | | |
|---------------------------------------|--------------|
| 1. Mhe. Sillo Daniel Baran, Mb | Mwenyekiti |
| 2. Mhe. Omari Mohamed Kigua, Mb | M/Mwenyekiti |
| 3. Mhe. Ali Hassan Omar King, Mb | Mjumbe |
| 4. Mhe. Issa Jumanne Mtemvu, Mb | Mjumbe |
| 5. Mhe. Oran Manase Njeza, Mb | Mjumbe |
| 6. Mhe. Josephat Sinkamba Kandege, Mb | Mjumbe |

7. Mhe. Leah Jeremiah Komanya, Mb	Mjumbe
8. Mhe. Joseph George Kakunda, Mb	Mjumbe
9. Mhe. Shally Josepha Raymond, Mb	Mjumbe
10. Mhe. Subira Khamis Mgalu, Mb	Mjumbe
11. Mhe. Esther Nicholas Matiko, Mb	Mjumbe
12. Mhe. Jonas William Mbunda, Mb	Mjumbe
13. Mhe. Luhaga Joelson Mpina, Mb	Mjumbe
14. Mhe. Mariam Madalu Nyoka, Mb	Mjumbe
15. Mhe. Juma Hamad Omar, Mb	Mjumbe
16. Mhe. Kwagilwa Reuben Nhamanilo, Mb	Mjumbe
17. Mhe. Tarimba Gulam Abbas, Mb	Mjumbe
18. Mhe. Amina Iddi Mabrouk, Mb	Mjumbe
19. Mhe. Riziki Said Lulida, Mb	Mjumbe
20. Mhe. Halima James Mdee, Mb	Mjumbe
21. Mhe. Zaytun Seif Swai, Mb	Mjumbe
22. Mhe. Dkt Charles Kimei, Mb	Mjumbe
23. Mhe. Mariam Nassoro Kisangi, Mb	Mjumbe

Mheshimiwa Spika, kwa namna ya pekee naomba kumshukuru Katibu wa Bunge Bi. Nanelwa Mwihambi *ndc* pamoja na watendaji wote wa Ofisi ya Bunge kwa kuiwezesha Kamati kutekeleza majukumu yake ipasavyo. Aidha, kwa namna ya pekee napenda kuishukuru Sekretarieti ya Kamati ya Bajeti ikiongozwa na Ndg. Michael Kadebe, Mkurugenzi wa Idara ya Bajeti kwa kuratibu shughuli za Kamati pamoja na kutoa ushauri wa kitaalamu na hatimaye kukamilika kwa taarifa hii kwa wakati.

Mheshimiwa Spika, naomba kuwasilisha na naunga mkono hoja.

Daniel Baran Sillo (Mb)

MWENYEKITI

KAMATI YA KUDUMU YA BUNGE YA BAJETI

08 Februari, 2022